

Uunga siunnersuut: Raajanut akitsuutit pillugit Inatsisartut inatsisaata allangortinneqarneranik Inatsisartut inatsisaat
(Aningaasaqarnermut Naalakkersuisoq)

Akissuteqaat

(Aningaasaqarnermut Naalakkersuisoq)

Aappassaaneerneqarnera

Aningaasaqarnermut Akileraartarnermullu ataatsimiititaliaq inatsisissatut siunnersuummut atatillugu peqqissaartumik suliaqarsimammat Naalakkersuisut sinnerlugit qutsavigaara.

Siunnersuut ataatsimiititaliap isumaqatigiissup tapersersoraa paasillugu nuannaarutigaa.

Raajanut akitsuutit pillugit Inatsisartut inatsisaata allangortinneqarneranik Inatsisartut inatsisissaattut siunnersuummut allannguutissatut siunnersuut maanna aappassaaneerinissami Naalakkersuisut sinnerlugit saqqummiuppara.

Allannguutissatut siunnersuutip kingunerissavaa nunanut allanut nioqquteqartut assartuinermini aningaasartuutiminnik ilanngussillutik naatsorsuisanngitsut raajat tunineranni akiat, akitsuutinik naatsorsuinissaq pisinnagu kiilumut 1 kr.-imik qaffattassagaat. Allannguutissatut siunnersuutip siunertaraa assartuinermini aningaasartuutit ilanngullugit ilanngunnagilluunniit tunisinermini akitsuutinik naatsorsuisarnerup kalluarneqannginnissaata siusinnerusukkut siunnersuutigineqartumiit anginerusumik qulakkeerneqarnissaa.

Nunanut allanut nioqquteqartut assartuinermini aningaasartuutit tunisinermini akigititaminnut ilanngullugit ilanngunnagilluunniit akitsuutinik akiliinngitsoorniarsinnaanerarat allannguutissatut siunnersuutip aamma killilissavaa, taamaammallu isertitassatigut annaasaqarsinnaaneq pinngitsoortissallugu.

Naalakkersuisut siunnersuutit kingunerisinnaasaannik misissuillaarsinnaallutillu nassuiaallu-arsinnaaqqullugit inatsisissatut siunnersuutit piffissaalluartillugu suliarineqartariaqarnerannik oqarneq Naalakkersuisut isumaqatigaat, tamannalu siunissami eqqumaffigiumaarlugu.

Taama oqaaseqarlunga siunnersuutip saqqummiunneqartup, maanna aappassaaneerinermini Naalakkersuisut allannguutissatut siunnersuutaannik ilallugu pingajussaaniigassanngortinneqarnissaa Naalakkersuisut sinnerlugit inassutigaa.